

Galas: PAS takut 'tak bertempat', kata Umno
Malaysiakini.com
September 29, 2010

Pemuda dan Wanita Umno Bahagian Gua Musang menyifatkan cadangan PAS agar Umno tidak meletakkan calonnya untuk bertanding dalam pilihan raya kecil DUN Galas itu sebagai "takut tidak bertempat".

Kedua-dua ketua sayap Umno bahagian itu berpendapat kenyataan penolong setiausaha agung PAS Datuk Takiyuddin Hassan itu juga sebagai bayangan bahawa mereka takutkan kekalahan.

Ketua Wanitanya, Datuk Wan Hazani Mohd Nor berkata cadangan itu langsung tidak praktikal kerana menang kalah dalam pilihan raya adalah adat pertandingan.

"Menang kalah dalam pilihan raya adat. Umno pernah menang dan tewas tetapi kita terima kekalahan itu dan begitu juga PAS yang pernah tewas di Galas pada 2004.

"Kenyataan ini adalah kata-kata orang penakut tidak bertempat dan ingin saya tegaskan Umno dan BN tidak mempunyai erti kata takut untuk bertanding pada pilihan raya kecil ini," katanya kepada *Bernama*.

Semalam, Takiyuddin yang memberikan cadangan itu atas nama perpaduan Melayu berkata Umno seharusnya membuktikan keikhlasannya menyatukan orang Melayu dengan tidak bertanding di DUN itu nanti.

Mursyidul Am PAS, Datuk Nik Abdul Aziz Nik Mat dalam komennya juga turut bersetuju dengan cadangan Takiyuddin itu malah berpendapat semua pihak perlu bersatu dalam PAS.

Mengulas perkara itu, Wan Hazani berkata Umno mempunyai keyakinan BN mampu merampas kembali DUN Galas itu berdasarkan kepada sokongan rakyat di DUN itu ketika ini.

Sementara itu, Ketua Pemuda bahagian itu, Bazlan Baharuddin berkata Umno mempunyai banyak calon berwibawa untuk digalaskan harapan bertanding DUN itu.

"Saya yakin kenyataan Takiyuddin itu keluar kerana mereka tidak mempunyai calon berwibawa berbanding Umno yang sudah bersiap sedia untuk menggempur DUN itu," katanya.

Pilihan raya kecil itu bakal diadakan berikutan kematian wakil rakyatnya, Chek Hashim Sulaima, 46, daripada PAS kerana barah usus, dua hari lalu di Hospital Pakar Al-Islam Kampung Baru, Kuala Lumpur.

Dalam pilihan raya umum 2008, Allahyarham memperoleh 4,399 undi menewaskan Mohamad Saufi Deraman dari BN dengan majoriti 646 undi.

- Bernama

